

Toni tschontscha, Eva tavella e Baltermia bagliaffa

Ina spassegiada atras il Grischun

DA CLAUDIA CADRUVI / ANR

■ «Ils Rumantschs discurren rumantsch.» Quai è ina frasa uschè banala ch'ins stuess bunamain dar ina enturn las ureglias a l'altura. Betg forsa pervi da la repetiziun dal pled «rumantsch». Questa repetiziun mussa sulet che l'altura na posseda nagina fantasia e nagina ispiraziun. Na. Il grond putgà è il pled «discurrer». Pertge, sche Rumantschs avran la bocca, lura fan els tut auter che mo discurrer.

Faschainsa in viadi. L'emprim giainsa cun la Retica en Surselva. A Trun sortinsa dal tren ed in-scuntrain Toni. Cun lez giainsa a baiver in en il Tschut. Toni «tschontscha» l'emprima da l'aura e suenter dain nus la bocca d'intgins enconuschents com-

munabels. Cura che nus avain baterlà avunda, tadlainsa ils tschantscherlims e las «tschatschras» a la maisas vischinantas. Ma lura èsi temp da cuntinuar il viadi.

A Rueras ans spetga Renata. Ella «resda» da la Porta Alpina. Il raschieni na piglia nagina fin perquai ch'i dat tantes raschuns pro e contra quest ascensur tujetschin. La baterlada sumeglia curt, ma già èsi nairas uras da dar adia. Nus turnain da la Surselva giadora e giain vers Schons.

Là faschainsa ina tura da skis sin il Beverin. Baltermia ans musa la via. Entant che nus buffain e na pudain strusch suenter, «bagliaffa» Baltermia d'in cuntin. Pir sisum vegnin nus da trair flad ed er da dir in u l'auter pled. Sche Baltermia na fiss betg in tal bater-

lun, fissan nus tut inchantads dad el e dal sutsilvan. Pertgè «bagliaffar» tuna insaco misterius e magic, forsa schizunt levet privlus.

A Parsonz avain nus in termin cun Batest. El «baita» ina bun'ura davart ils bulieus ch'el ha chattà amez l'enviern davos il hotel «Cubbe» a Savognin. Damai che nus n'essan betg segirs, sch'i sa tracta tar quests bulieus plitost da tschagulas grossas, prendainsa svelt cumià e svainin vers il Güglia.

En l'Engiadin'Ota avainsa in rendez-vous cun Ramun. El vul «raschuner» cun nus davart ils problems cun ils ritgs che sa rasan or en la regiun. Suenter in ple-doyer persuadent da Ramun essan er nus persuenter da renaturalisar l'entira Engiadin'Ota e da plafonar tuttas segundas abitaziuns.

Malgrà che la bocca fa mal dal «tschintschar», «resdar», bagliaffar», «baitar» e «baterlar» cuntinuain nus noss viadi e giain tar Curdin a Scuol.

El ans «quinta sü üna pruna» da l'urs ch'è stà en l'Engiadina Bassa. Ma cura ch'el cumenza a descriver co ch'el, Curdin, haja schizunt dà la toppa a l'urs, avain nus il sentiment che Curdin ans «quinta sü üna blaua» e schain tschüss.

Cun ir sur il Pass dal Fuorn pensainsa ch'i saja bain impussibel da chattar en l'ultima val anc insatge nov. Ma a Fuldera ans spetga Eva. Ella di: «Jau 'tavel' jauer. Vegni cun mai en la taverna. Là faschainsa ina bella tavelada.»

Da la surpraisa na rabitschaint ora gnanca pap pli.